



Republika e Kosovës – Republika Kosova  
Paneli Zgjedhor për Ankesa dhe Parashtresa  
Izborni Panel za Žalbe i Predstavke

Anr.366/2021

**Paneli Zgjedhor për Ankesa dhe Parashtresa (PZAP)**, në panelin e përbërë nga gjyqtarët: Burim Ademi kryesues, Zyhdi Haziri dhe Ferki Xhaferi anëtarë, me pjesëmarrjen e Zyrtares të Lartë Ligjore Valbona Millaku Foniqi duke vendosur përkitazi me ankesën e Lëvizjes Vetëvendosje (LVV), me seli në Skenderaj, paraqitur kundër subjektit politik Partia Demokratike e Kosovës (PDK), me seli në Prishtinë, për shkak të përdorimit të gjuhës denigruese, fyese, nxitëse dhe ofenduese, gjatë fushatës zgjedhore, për Zgjedhjet e Parakohshme për Kuvendin e Republikës së Kosovës që do të mbahen më datë 14 shkurt 2021, në seancën e panelit të mbajtur më datë 12.02.2021 mori këtë:

### V E N D I M

**I. Pranohet** e bazuar ankesa e Lëvizjes Vetëvendosje LVV, me seli në Skenderaj, Anr.366/2021 e datës 10.02.2021, për shkak të *përdorimit i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve*, subjektit politik Partia Demokratike e Kosovës -PDK, me seli në Prishtinë, i shqiptohet dënimi më gjobë në lartësi prej 8,000.00 (tetë mijë) euro për të cilën detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënim të përmbarimit.

**II. Urdhërohet** subjekti politik Partia Demokratike e Kosovës PDK, me seli në Prishtinë, që brenda afatit prej 24 orëve nga pranimi i këtij vendimi, ta përmirësoj shkëlqen e përcaktuar si në pikën -I- të dispozitivit të këtij vendimi, në të kundërtën mund të sanksionohet me dënim shtesë nga PZAP-i.

### A r s y e t i m

Me datë 10.02.2021, PZAP-i ka pranuar një ankesë nga Lëvizja Vetëvendosje LVV, me seli në Skenderaj, me të cilën pretendon se nënkryetari i PDK-së nga radhët e Partisë Demokratike të Kosovës PDK Sami Lushtaku në një tubim të organizuar në një odë, duke ju referuar kryetarit të Lëvizjes Vetëvendosje, Albin Kurti, thekson se “Nuk jem fajtor na, pse ai nuk ka qenë në luftë në Kosovë. U ardhë në Likoc, e kemi lutë me marrë armen, ska guxu, u ardhë në Prishtinë e kanë burgos sikur një “zagar të vogël” edhe e kanë qu në Beograd”. Parashtruesit e ankesës si dëshmi lidhur me rastin në fjalë ankesës ia kanë bashkangjitur CD-në.

Lëvizja Vetëvendosje LVV pretendon se nënkryetari i PDK-së nga radhët e Partisë Demokratike të Kosovës PDK Sami Lushtaku ka përdorur gjuhë të urrejtjes kundër kryetarit të Lëvizjes Vetëvendosje, Albin Kurti. LVV pretendon se subjekti politik PDK ka cenuar rëndë nenin 33 pika l, të Ligjit për Zgjedhjet e Përgjithshme, lidhur me nenin 4.Par.1 pikës k) të Rregullës Zgjedhore të KQZ-së, nr.11/2013, e ndërsa qëllimi i këtij ligji dhe kodit të mirësjelljes se subjekteve politike është krijimi i kushteve në të cilat populli i Kosovës mund të zgjedhë përfaqësuesit e tij përmes zgjedhjeve të lira të drejta dhe të mirë informuara në një atmosferë të tolerancës demokratike paqes dhe respektit për sundimin e ligjit. Andaj bazuar në atë që u theksua me sipër i njëjti konsideron se subjekti politik në fjale ka bere shkelje te

dispozitive ligjore ne fuqi dhe si dëshmi për pretendimet e tij, ankesës i ka bashkangjitur një CD, në cilësi të provës materiale.

Në përgjigjen në ankesë të datës 11.02.2021, subjekti politik Partia Demokratike e Kosovës deklaroi se Sami Lushtaku, nuk është kandidat për deputet nga radhët e PDK-së, dhe i njëjti në tubimin e cekur nga ankuesi, në vazhdim të fushatës ka debatuar me qytetarë lidhur me diskursin publik të liderit të VV-së karshi partive tjera dhe gjuha e përdorur nuk është gjuhë e urrejtjes, dhe se nuk mund të konstatohet me asnjë shprehje se ka gjuhë të urrejtjes në deklarinimin e Lushtaku. PDK deklaroi se me datë 02.02.2021, në bazë të nenit 32 paragrafi 32.6 të Ligjit Nr.03/L-073 për Zgjedhjet e Përgjithshme në Republikën e Kosovës përmes njoftimit zyrtar në webfaqen e partisë kemi kërkuar respektimin në tërësi të legjislacionit dhe kodit të etikës për zgjedhjet.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

#### **Ankesa është e bazuar**

Nga shkresat e lëndës vërtetohet se Lëvizja Vetëvendosje LVV, me seli në Skenderaj, ka parashtruar ankesë PZAP A.nr 366/2021 më datë 10.02.2021, me të cilën pretendon se nënkryetari i PDK-së nga radhët e Partisë Demokratike të Kosovës-PDK Sami Lushtaku, ka përdorur gjuhë të urrejtjes kundër kryetarit të Lëvizjes Vetëvendosje, Albin Kurti. Pas pranimit të ankesës në PZAP, e njëjta i është dërguar subjektit politik PDK për përgjigje në ankesë.

Subjekti politik PDK me datë 11.02.2021, ka paraqitur përgjigje në ankesë, duke i kundërshtuar në tersi pretendimet e ankuesit të parashtruara në ankesë dhe duke kërkuar që ankesa të refuzohet e pa bazuar.

Duke u nisur nga gjendja e konstatuar faktike, Paneli konstaton se nga prova e ofruar shihet qartë se nga ana e nënkryetarit të PDK-së nga radhët e Partisë Demokratike të Kosovës-PDK Sami Lushtaku, është shkelur dispozita e nenit 33 pika l), e LZP-së, e cila ndër të tjera përcakton se; *‘Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve’*, për faktin se në video incizimin e këtij subjekti politik është përdorur gjuhë denigruese, fyese dhe ofenduese kundër kryetarit të Lëvizjes Vetëvendosje, Albin Kurti.

Video incizimi i Subjektit politik, po ashtu ka mesazhe që nxit dhe provokon urrejtjen ndaj kryetarit të Lëvizjes Vetëvendosje, Albin Kurti ku thuhet se: “Nuk jem fajtor na, pse ai nuk ka qenë në luftë në Kosovë. U ardhë në Likoc, e kemi lutë me marrë armen, ska guxu, u ardhë në Prishtinë e kanë burgos sikur një “zagar të vogël” edhe e kanë qu në Beograd” dhe sipas vlerësimit të Panelit, me përdorimin e kësaj gjuhe, në incizim nxitet urrejtja kundër të tjerëve.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen nënkryetarit të PDK-së nga subjekti politik PDK në zgjedhjet e mëparshme që konsiston në faktin se subjekti politik Partia Demokratike e Kosovës, ka qenë i njoftuar me obligimet dhe përgjegjësit gjatë procesit

të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur më fushatën zgjedhore.

Po ashtu si rrethanë PZAP-i, mori edhe faktin që këtij subjekti, i'a dha mundësinë për tu përgjigjur ashtu që në përgjigjet e tij ka mohuar shkeljet e supozuara, duke dhënë përgjigje se Sami Lushtaku nuk është kandidat për deputet nga radhët e PDK-s dhe gjuha e përdorur nuk është gjuhë e urrejtjes. Paneli vlerëson se duke u nisur nga fakti se Sami Lushtaku është nënkryetar i partisë dhe mbështetës i partisë, subjekti politik i lartpërmendur ka bërë shkelje të Kodit Të Mirësjelljes Kodit të Mirësjelljes për subjektet politike, Mbështetësit e tyre dhe Kandidatët, veprime këto që janë në kundërshtim me nenin 33 pika l), e LZP-së, e cila ndër të tjera përcakton se; *'Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve, ose duke publikuar ose përdorur fotografi, simbole ose çfardo lloj materiali tjetër që ka ose mund të ketë ndikim të tillë'*.

Paneli konform nenit 120.1 pika a) të LZP-së urdhëroi subjektin politik Partia Demokratike e Kosovës, që të marrë masa dhe të përmirësoj shkeljet në afatin prej 24 orëve dhe nëse i njëjti nuk vepron sipas urdhrit të panelit do të sanksionohet me dënim shtesë nga PZAP-i , në pajtim me nenin 120.2 të LZP-së.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

#### **Paneli Zgjedhor për Ankesa dhe Parashtrës**

Anr. 366/2021 më datën 12.02.2021



**Këshillë Juridike:** Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes pranimit të këtij vendimi.